

6. maj 2014

UPA 2014/55  
Nikolaj Jeremiassen

**Inissialiornermut, illunut ataatsimoorussanut, illuliassanut il.il. tapersiissuteqartar-neq pillugu Inatsisartut peqqussutaat nr. 11, 19. november 2007-imeersumi kapitali 4-ip allangortinneqarnissaanik Naalakkersuisut sulissuteqaqqullugit peqquneqarnissaannik Inatsisartut aalajangiiffigisassaattut siunnersuut, taamaaliornikkut illuutit ataasiakkaat niuernermi naleqassusaannut naleqqussaasoqarnissaa qulakkeerneqarsinnaaqqullugu.**

**(Inatsisartuni ilaasortat Knud Kristiansen aamma Gerhardt Petersen, Atassut)**

Siumumiit anguniagaraarput innuttaasut pitsaasumik akilerneqarsinnaasumik peqqinartumillu ineqarnissaat, tamatumalu nassatarisaanik malittarisassat tamanut naligiissumik periarfissiisut atuutsinneqarnissaat.

Siunnersuuteqartut saqqummiussaqaqarnerminni qulakkeerusuppaat Inatsisartut peqqussutaanni kapitali 4-ip allangortinneqarneratigut assigiimmik periarfissaqartoqarnissaanik aqutissiuussinissaq, tamannalumi Siumup anguniagaanut naapertuulluinnarpoq.

Siunnersuuteqartut Siumumiit isumaqatigaavut akisussaassulimmik iliuseqarnissaq qulakkeersimaniartariaqarmat aamma niuernikkut akit eqqarsaatigalugit.

Peqqussummi kapitali 4-mi annertuumik imaqarpoq taamaattumik suliassaq immikkoortuni siunnersuuteqartut saqqummiussaqaqarnerattut Naalakkersuisut Inatsisartunit sulissuteqaqqullugit peqquneqarnissaannik aalajangiiffigisassatut siunnersuuteqarnerat taperserparput.

Illuutit ataasiakkaat niuernermi naleqassusaannut naleqqussaasoqarnissaa qulakkeertariaqartoq Siumut isumaqarpoq taamaattumillu siunnersuummi kapitali 4-mi allangortinneqarnissaanik siunnersuut akuersaarlugu Ineqarnermut Ataatsimiititaliamut innersuupparput.